



# Communicaziun a las medias

Data: 31 d'avust 2022

---

## Il Cussegl federal iniziescha ina campagna da spargnar energia

Il Cussegl federal ha decidì numerusas mesiras, per che la Svizra possa rinforzar svelt il provediment d'energia per l'enviern. La campagna ch'è vegnida lantschada oz cun il slogan «L'energia è stgarsa. Na la sfarlattain betg.» cumplettescha questas mesiras. Ella mussa, co che la populaziun e l'economia pon spargnar energia cun tips ch'èn simpels da realisar. La finamira è quella che uschè bleras personas sco pussaivel sa participeschian voluntarmain a la campagna – e gidian che la Svizra na vegnia gnanc en ina situaziun da mancanza. La Confederaziun ha elavurà la campagna ensemen cun passa 40 partenaris da l'economia, da la societad civila e dal maun public. Il Cussegl federal è ultra da quai vegnì infurmà en sia sesida dals 31 d'avust 2022, che quests partenaris fundeschan ina «Allianza per spargnar energia». En vista a l'enviern duai quella vegnir schlargiada cuntinuadamain.

Cun diversas mesiras procura il Cussegl federal ch'il provediment d'energia per l'enviern vegnint vegn rinforzà svelt. Latiers tutgan per exempel reservas supplementaras da gas e d'electricidad. L'emna passada ha il Cussegl federal ultra da quai decidì, che la Svizra duai metter a sasezza ina finamira voluntara da spargnar 15% gas durant il semester d'enviern. Oz ha la Confederaziun plinavant lantschà sia campagna da spargnar energia.

### «L'energia è stgarsa. Na la sfarlattain betg.»

Quai è il messadi principal da la campagna naziunala che duai durar fin l'avrigl 2023. Las recumandaziuns da spargnar energia sa drizzan a la populaziun ed a l'economia. Ellas mussan, co ch'ins po spargnar facilmain energia – gas, ieli, electricidad ed auters purtaders d'energia – tant a chasa sco er a la piazza da lavur: cun stgaudar main fitg las stanzas, cun duvrar pli pauca aua chauda, cun serrar giu ils apparats electrici u l'illuminaziun, cur ch'ins n'als dovra betg, ubain cun cuschnar en ina moda che spargna energia.

Visualisadas vegnan las recumandaziuns da spargnar energia cun fotografias da chalira. Quellas illustreschan, quant svelt che l'energia po ir a perder, sch'ins na fa betg atenziun. Las bleras recumandaziuns dastgassan gia esser enconuschentas a la blera glied. En il mintgadi vegnan ellas dentant mintgatant emblidadas. La finamira da la campagna èsi perquai, da puspè far endament ellas a tuttas e tuts, uschia che uschè bleras persunas sco pussaivel sa participeschan e gidan ad evitar ina situaziun da mancanza en Svizra.

Las recumandaziuns vegnan preschentadas sin la pagina d'internet *nicht-verschwenden.ch*, sin placats, en inserats ed er sin ils chanals da social media da la Confederaziun. Las organisaziuns da l'economia, da la societad civila e dal maun public derasan supplementarmain las recumandaziuns sin lur chanals.

### **Campagna da spargnar energia cun grond sustegn**

La campagna tutga tar l'iniziativa per spargnar energia durant l'enviern ch'il Departament federal per ambient, traffic, energia e communicaziun (DATEC) ed il Departament federal d'economia, furmaziun e retschertga (DEFR) han preparà cuminaivlamain. La campagna è vegnida elavurada en cooperaziun cun in comité consultativ sco er cun ina gruppa accumpagnanta cun passa 40 associaziuns ed organisaziuns. Represchentads èn stads ils chantuns, las citads e las vischnancas, las associaziuns d'energia, associaziuns da l'economia sco er organisaziuns da la societad civila. Quests gremis vegnan er a cooperar tar l'ulterier svilup da l'iniziativa. Ella duai vegnir extendida en il decurs dal temp cun novs cuntegns. En cas ch'i vegn tar ina situaziun da mancanza, pon ils appels da spargnar energia tenor la Lescha davart il provediment dal pajais remplazzar las recumandaziuns da spargnar.

Ils cuntegns ed ils motivs da la campagna stattan a disposiziun als partenaris per als derasar sur lur chanals, uschia ch'ils numerus acturs publics e privats pon dar tips unitars per spargnar energia – ed augmentar la visibilitad da la campagna.

### **Allianza per spargnar energia**

En il rom da l'iniziativa per spargnar energia durant l'enviern han la Confederaziun sco er organisaziuns ed associaziuns da l'economia inizià cuminaivlamain la «Allianza per spargnar energia». L'economia, la societad civila ed il maun public sustegnan pia las stentas naziunalas per spargnar energia e per rinforzar la segirezza dal provediment. Ina participaziun a la «Allianza per spargnar energia» è pussaivla per tut las organisaziuns. Persunas interessadas da l'economia, da la societad civila e dal maun public pon sa participar sur [www.alliance2022-23.ch](http://www.alliance2022-23.ch). L'act da fundaziun uffizial da la «Allianza per spargnar energia» ha lieu ils 26 d'october 2022.

### **Hotline**

Per dumondas en connex cun spargnar energia stat a disposiziun sut il numer: **0800 005 005** l'infoline extendida dad EnergiaSvizra (realisaziun da tips per spargnar energia, dumondas tecnicas). Sut il medem numer vegnan respundidas er tut las autras dumondas da las burgaisas e dals burgais, ma er da l'economia en connex cun spargnar energia.

Persunas privatas ed interpresas pon er sa drizzar per **e-mail** a la hotline:  
hotline@bwl.admin.ch.

**Contact/dumondas:**

Marianne Zünd, manadra da Medias e politica, Uffizi federal d'energia (UFE)  
058 462 56 75, [marianne.zuend@bfe.admin.ch](mailto:marianne.zuend@bfe.admin.ch)

Communicaziun, Uffizi federal per il provediment economic dal pajais (UFPE)  
058 467 32 20, [media@bwl.admin.ch](mailto:media@bwl.admin.ch)

**Departament responsabel:**

Departament federal per ambient, traffic,  
energia e communicaziun DATEC

**Link:**

[www.nicht-verschwenden.ch](http://www.nicht-verschwenden.ch)